



Միսաք Մեծարեւնց

Թրթռումներ

Լոյսի բիծեր ծիրանի
Կ'աստղատեն քողքը մութին.
Լուսնի ցուլքեր կ'անհետին
Խորքը ծովուն հովանի:

Հըմայքներով փողփողուն,
Հեշտութիւն մը կապոյտի,
Հանդարտօրէն կը Ժպտի
Հոգւոյս մըռայլ տենչերուն:

Սիրոյ յուշեր լուսաւէտ,
Դողդոջուն ու ցնձագին,
Արագօրէն կը ծագին
Հըպարտ կ'անցնիմ երբ քովէդ:

Ըզգացում մը բիրեղէ,
Ծիածանի երանգով,
Ցաւոտ հոգւոյս մութին քով
Լոյս ակօսներ կը պեղէ: